



REPUBLIKA E SHQIPËRISË
KËSHILLI I LARTË I PROKURORISË

VENDIM

Nr. 78, datë 24.04.2025

PËR

“PËRFUNDIMIN E PROCEDIMIT DISIPLINOR TË FILLUAR NDAJ ISH-MAGJISTRATIT ERIND REOVICA PA VENDIM PËRFUNDIMTAR”

Këshilli i Lartë i Prokurorisë, me pjesëmarrjen e:

1. Zonjës Mirela BOGDANI	Kryetar
2. Zotit Erind GERMENJI	Zv/Kryetar
3. Zotit Sokol STOJANI	Anëtar
4. Zotit Zeqir HODA	Anëtar
5. Zonjës Arta MANDRO	Anëtar
6. Zonjës Ledina RIZA	Anëtar (në mungesë)
7. Zotit Moisi DUDA	Anëtar
8. Zotit Vatë STAKA	Anëtar
9. Zotit Olger EMINAJ	Anëtar
10. Zotit Erind MERKURI	Anëtar
11. Zotit Erion FEJZULLA	Anëtar

në mbledhjen e datës 24.04.2025, në përputhje me procedurën e përcaktuar në nenet 159-161, 164 e vijues, të ligjit nr. 115/2016 “Për organet e qeverisjes së sistemit të drejtësisë” i ndryshuar dhe në nenet 18 e vijues, të Rregullores “Për organizimin dhe funksionimin e brendshëm të Këshillit të Lartë të prokurorisë”, shqyrtoi çështjen me objekt:

“Përfundimin e procedimit disiplinor të filluar ndaj ish-magjistratit Erind Reovica pa vendim përfundimtar”

KËSHILLI I LARTË I PROKURORISË:

Nga shqyrtimi i materialit shkresor të përbërë nga Relacioni shoqërues Nr. 1204 prot., datë 16.04.2025, i Komisionit Disiplinor, dëgjoi relatorin Erind Germenji, si dhe referuar bazës ligjore të lartpërmendur, përfshirë diskutimet në mbledhje mbi çështjen,

V Ë R E N:

1. Këshilli i Lartë i Prokurorisë (në vijim Këshilli) është institucioni që garanton pavarësinë, disiplinën, statusin dhe karrierën e prokurorëve në Republikën e Shqipërisë.
2. Pranë Këshillit është depozituar shkresa nr. 117/6 prot., datë 24.10.2022, ardhur nga Inspektori i Lartë i Drejtësisë, *“Kërkesë për fillimin e procedimit disiplinor ndaj magjistratit Erind Reovica, aktualisht me detyrë prokuror në Prokurorinë pranë Gjykatës së Rrethit Gjyqësor Fier”*, me të cilën ka propozuar caktimin ndaj magjistratit Erind Reovica, të masës disiplinore *“shkarkim nga detyra, për shkeljen disiplinore të parashikuar nga neni 102, pika 1, shkronjat “d” dhe “dh”, të ligjit nr. 96/2016 “Për statusin e gjyqtarëve dhe prokurorëve në Republikën e Shqipërisë”, i ndryshuar¹*.
3. Rezulton se, paralelisht me procesin e mësipërm disiplinor të Inspektorit, ndaj magjistratit Erind Reovica, në cilësinë e subjektit të rivlerësimit është zhvilluar edhe një proces tjetër administrativ sipas ligjit nr. 84/2016, *“Për rivlerësimin kalimtar të gjyqtarëve dhe prokurorëve në Republikën e Shqipërisë”*.
4. Në përfundim të këtij procesi, me Vendimin nr.508, datë 10.02.2022, Komisioni i Pavarur i Kualifikimit ka vendosur shkarkimin nga detyra të prokurorit Erind Reovica. Ndaj këtij vendimi, prokurori Erind Reovica ka paraqitur ankim në Kolegjin e Posaçëm të Apelimit, ku është regjistruar çështja (JR) nr. 18/2022, datë 12.04.2022.
5. Në përputhje me pikën 6, të nenit F, të Aneksit *“Rivlerësimi kalimtar i gjyqtarëve dhe prokurorëve”*, të Kushtetutës së Republikës së Shqipërisë, kur ushtron ankim kundër masës disiplinore të shkarkimit nga Komisioni i Pavarur i Kualifikimit, subjekti i rivlerësimit pezullohet nga detyra deri në marrjen e vendimit nga Kolegji i Posaçëm të Apelimit.
6. Referuar përcaktimeve ligjore shprehur në nenet 126 dhe 145, të Ligjit për Statusin, si dhe nenit 66, të ligjit nr. 44/2015 *“Kodi i Procedurave Administrative të Republikës së Shqipërisë” i ndryshuar*, Këshilli ka konsideruar se është në kushtet e pezullimit të procedimit disiplinor të filluar nga Inspektori deri në përfundim të procesit të rivlerësimit kalimtar me vendim të formës së prerë, duke vlerësuar se mbajtja ose jo e statusit të magjistratit nga prokurori Erind Reovica, përbën parakusht për shqyrtimin në themel të procedimit disiplinor të Inspektorit, të filluar në ngarkim të tij.
7. Në zbatim të dispozitës kushtetuese cituar në pikën 7, Këshilli ka marrë Vendimin nr. 307, datë 21.11.2022, *“Për pezullimin e procedimit disiplinor të filluar ndaj magjistratit Erind Reovica, me detyrë prokuror në Prokurorinë pranë Gjykatës së Shkallës së Parë Fier”*, duke pezulluar procedimin disiplinor në ngarkim të magjistratit Erind Reovica, deri në përfundimin e procesit të rivlerësimit kalimtar në Kolegjin e Posaçëm të Apelimit.

¹ Më tej “Ligji për Statusin”

8. Pas shqyrtimit të ankimit të prokurorit ndaj Vendimit nr.508, datë 10.02.2022, të Komisionit të Pavarur të Kualifikimit, me Vendimin nr.23, datë 18.03.2025, Kolegji i Posaçëm i Apelit ka vendosur lënien në fuqi të vendimit për shkarkimin nga detyra. Më marrjen formë të prerë të këtij vendimi, zoti Erind Reovica ka humbur statusin e magjistratit, duke mos e ushtruar më këtë funksion.

9. Me rënien e shkakut ligjor të pezullimit, me Vendimin nr. 66 datë 10.04.2025, "*Për shfuqizimin e Vendimit nr. 307 datë 21.11.2022 "Për pezullimin e procedimit disiplinor të filluar ndaj magjistratit Erind Reovica, me detyrë prokuror në Prokurorinë pranë Gjykatës së Shkallës së Parë Fier"*", Këshilli ka vendosur shfuqizimin e vendimit të pezullimit dhe vijimin e shqyrtimit të procedimit disiplinor.

10. Procesi i rivlerësimit kalimtar dhe procedimi disiplinor sipas Ligjit për Statusin janë dy procese të pavarura nga njëri tjetri që zhvillohen nga organe të ndryshme, të pavarura dhe sipas procedurave të ndryshme ligjore. Këto procese kanë ndikim ndaj njëri-tjetrit duke përcaktuar vijueshmërinë e tyre. Kështu, procesi i rivlerësimit, që është një proces i detyrueshëm për të gjithë prokurorët në detyrë (në momentin e miratimit të ndryshimeve kushtetuese të vitit 2016), përcakton vijimin e gëzimit nga ata të statusit të magjistratit sipas Ligjit për Statusin. Nga ana tjetër, moskalimi me sukses i procesit të rivlerësimit passjell mbarimin e menjëhershëm të statusit të magjistratit.

11. Në nenin 164, pika 1, shkronja "b", të Ligjit për Statusin, në dispozitat kalimtare, parashikohet se: "*1. Gjyqtarët dhe prokurorët në detyrë gëzojnë statusin e magjistratit të parashikuar në këtë ligj vetëm nëse: b) kalojnë me sukses procesin e rivlerësimit, në përputhje me ligjin "Për rivlerësimin kalimtar të gjyqtarëve dhe prokurorëve në Republikën e Shqipërisë"*".

12. Neni 179/b, pika 7, e Kushtetutës parashikon se: "*7. Moskalimi me sukses i procesit të rivlerësimit përbën shkak për mbarimin e menjëhershëm të ushtrimit të detyrës, krahas shkaqeve të parashikuara në Kushtetutë...."*

13. Sa më sipër, prokurori Erind Reovica nuk gëzon më statusin e magjistratit dhe nuk mund të jetë më objekt i veprimtarisë së Këshillit. Mënyra e përfundimit të procesit të rivlerësimit kalimtar (pas vendimit nr.23, datë 18.03.2025, të Kolegjit të Posaçëm të Apelit) ndaj zotit Erind Reovica ka ndikim të drejtpërdrejtë dhe kushtëzon vijimin e procedimit disiplinor ndaj tij, në harmoni dhe me përcaktimin e nenit 95 të Kodit të Procedurave Administrative, kod i cili është i detyrueshëm për t'u zbatuar nga Këshilli (neni 189, pika 3, i ligjit nr. 115/2016 "*Për organet e qeverisjes së sistemit të drejtësisë*" i ndryshuar).

14. Në vijim, referuar nenit 95, të Kodit të Procedurave Administrative, ku parashikohet se: "*Organi publik deklaron të përfunduar procedurën administrative pa një vendim përfundimtar për çështjen, kur objekti për të cilin kishte nisur procedura apo qëllimi i tij është bërë i pamundur*", shqyrtimi i procedimit disiplinor të filluar ndaj ish-magjistratit Erind Reovica, me detyrë prokuror në Prokurorinë pranë Gjykatës së Shkallës së Parë të Juridiksionit të Përgjithshëm Fier duhet

ndërprerë pa një vendim përfundimtar për shkak se objekti për të cilin kishte nisur është bërë i pamundur.

Përsa më sipër, Këshilli i Lartë i Prokurorisë, konstaton se:

15. Prokurori Erind Reovica nuk gëzon më statusin e magjistratit dhe nuk mund të jetë më objekt i veprimtarisë së Këshillit.

16. Referuar Relacionit shoqërues nr. 1204 prot., datë 16.04.2025, Komisioni Disiplinor, unanimisht i ka propozuar Këshillit, përfundimin e procedimit disiplinor të filluar ndaj ish-magjistratit Erind Reovica, pa një vendim përfundimtar.

PËR KËTO ARSYE:

Bazuar në nenet 149, pika 1, 149/a, pika 1, shkronjat “b”, “e” dhe neni 179/b, pika 7, të Kushtetutës, nenin 164, pika 1, shkronja “b”, të ligjit nr. 96/2016 “Për statusin e gjyqtarëve dhe të prokurorëve në Republikën e Shqipërisë” i ndryshuar, nenet 164, pika 8, 166, pikat 2 dhe 6, neni 189, pika 1, germa “a”, dhe neni 192, pika 1, të ligjit nr. 115/2016 “Për organet e qeverisjes së sistemit të drejtësisë” i ndryshuar dhe në nenin 95 të Kodit të Procedurave Administrative të Republikës së Shqipërisë, Këshilli i Lartë i Prokurorisë,

V E N D O S I:

1. Përfundimin e procedimit disiplinor të filluar ndaj ish-magjistratit z. Erind Reovica, pa një vendim përfundimtar.
2. Një kopje e vendimit t’i njoftohet zotit Erind Reovica dhe Inspektorit të Lartë të Drejtësisë.
3. Kundër këtij vendimi lejohet ankim në Gjykatën e Apelit Administrativ, brenda 15 (pesëmbëdhjetë) ditëve nga dita e njoftimit të vendimit të arsyetuar.
4. Ky vendim hyn në fuqi menjëherë dhe publikohet në faqen zyrtare të internetit të Këshillit, pasi të redaktohet për sigurimin e anonimatit të subjekteve
5. U shpall në Tiranë, sot më 24.04.2025.

KRYETAR

Mirela Bogdani

ANËTAR

Sokol Stojani

ANËTAR

Zeqir Hoda

ZV/KRYETAR

Erind Gërmenji

ANËTAR

Arta Mandro



ANËTAR
Moisi Duda

ANËTAR
Vatë Staka

ANËTAR
Olger Eminaj

ANËTAR
Erind Merkuri

ANËTAR
Erion Fejzulla

KOPJE WEB